

PIITA **gbounsinsinn nba ki u din sob** **nae na**

Ki jiin 1 Piita gbouŋ na po

Piita sinsinn gbouŋ na din saa Yiisaweira nba ki bi yib “Yennu nigannkab” na boore. Ŋamme din yat be Asia gaŋ po yent na ni.

Gbouŋ na barjar tee lin tur binba be mukir nan biak ni, bi yada paak nae kraŋ-n-moŋ.

¹ Min Piita nba tee Yiisa Masia toonii nae sobin gbouŋ na ki teen Masiaweira nba yat ki be Pontus nan Galasia nan Kapadosia nan Asia nan Bitinia tini ni ki tee saamm na. ² Ti Baa Yennu doŋ ganni, ki mi nan i tan saa teen u niiba, ki u Seyeen te ki i tee popeendamm, ki u ganni a yii saak Yiisa Masia mɔb, ki u wuur i para nan u sɔn. Yennu ninkpabaug nan parmaasir-ii be nani bonchiann.

Ki jiin barmɔnii dindann po

³ Pakin Yennu nba tee ti Yomdaano Yiisa Masia Baa na man, kimaan u tint ninbaauk bonchiann ki turit manfopaann Yiisa Masia kuun fiiru paak. Linba nae te ki ti mɔk dindann nan ti tan sii mɔk manfoor, ⁴ ki la linba tee Yennu waas yar, ki li sii be mɔkmɔk nan mɔkmɔk, ki kan biir, li fant bia kan siiri, ki li be Yendouŋ ni ⁵ ki guu yimm nba ki Yennu paŋ dia-i, i yada paak, a yin la i tinnu nyɔot nba teen siir ki saa nyi paanu, dajoontii na.

⁶ Li paak, ii mək parpeenn man; li-i lekii tee ki i mək parbiir yoo waamina mətana, yaa la biakbooru booru na paak, ii mək parpeenn.

⁷ Biak maŋ bikii-i a lin laan i teen Masia yada fanuwa-a? Li tee nan baa tuu jii salima ki teen muu ni a bin la li ŋant nae. I yada teenu ŋan Yennu boor ki gar salima gbaa. I yada teenu-i ŋan, ŋanne saa te ki yin la paku nan dontir nan baakir, yoo nba ki Yiisa Masia tan saa nyi paanu na.

⁸ I ki mi lau ŋaan loonɔ; i bia ki laato mətana, ŋaan teenɔ yada, ki mək parpeenn bonchiann nba ki niro kan fit wann laa tee bianɔnba. ⁹ Yaa teenɔ yada na paak, i la tinnuwa. ¹⁰ Tinnu nae ki sokiniinba din loon bin bann li paak nan ninmɔnn, ki sokint a yimme ki Yennu saa tini ninbaauk na. ¹¹ Masia Seyeeŋ nba din be bi ni na din wannib a u tan saa di biak; ki li poorpo ki u bia tan saa la baakir bonchiann; ki bi koor a bin bann yoo nba ki li tan saa tun, ki bia loon bin bann laa tan saa tun bianɔnba. ¹² Ki Yennu fiit wannib a bi ki sokint bi mɔŋ sommir paak kaa, ŋaan i sommir poe ki bi sokint. Yennu Seyeeŋ nba ki u din tumo a wun nyi Yendouŋ ni nae mun te ki binba mɔontir barŋanii na beeri barii maŋ. Linba nae ki malakanba gbaa loon bin bann li paak.

Ki jiin kasii binbeŋ po

¹³ Li paak, ii teen i dudukit siir nan yan, ki soor i mɔŋ, kii mək dindann nan barmɔnii nan i saa di manu bonchiann, yoo nba ki Yiisa Masia tan saa nyi paanu na. ¹⁴ Ii sak Yennu mɔb man, ki ji daa waa loonbiit nba ki i din waa, yoo nba

ki i din ki mi Yiisa Masia na. ¹⁵ Yennu nba yiini na tee kasiie, li paak, ii muni tee kasii man, ¹⁶ kimaan li sob Yennu gbouŋ ni a “Ii tee kasii man, kimaan min Yennu tee kasiie.”

¹⁷ Li-i tee ki i mei Yennu, i yiu Baae; ŋooe bu niib kur buut nan baa tun biaŋinba na, ki ningannii kaa; li paak, yoo nba kur ki i be tingbouŋ na ni, ii tiino man. ¹⁸ I mi nan Yennu nba nyinni binbenbiik nba ki i din gaar i baanba boor na, u ki jii bont nba saa biir nan likirii nba saa biir biaŋinba na kaa ki pa, ¹⁹ ŋaan u jii Yiisa Masia son nba ŋan gar likirii nae; ki u tee nan maruŋ pegann nba ki mok biit koo dok u paak na. ²⁰ Yennu nba daa din ki nan durinya yoo nba na, ŋaan ki u poŋ gann Masia a wuu tee maruŋ maŋ, ki u tan nyii paanu dajoontii na ni, ti paak. ²¹ U paake ki i teen Yennu yada. ŋooe din fiino kuun ni ki turo paŋ; li paake ki i mok yada nan dindann Yennu boor.

²² Yaa gaar Masia labaar nae ki i nyii biit ni, ki ji loon i naa waas nan barmonii; li paak, ii loon i leeb man nan i para kura. ²³ I la manfopaanna. Li manfoor ki nyii bonboorik nba kpenn ni kaa, ŋaan li nyii bonboorik nba ki kpenn na nie. Yennu maan nba mok manfoor ki sii be mokmok nan mokmok nae turi manfoor maŋ. ²⁴ Li sob Yennu gbouŋ ni a:

“Nisaarik kur tee nan moot nae,
ki u fant tee nan moot puuk na.
Moot jookit ki li puut suur baa,

²⁵ ŋaan Yennu maan na ŋarin kaa gbennu.”

Maan maŋe tee barganii nba ki bi din moontir ki teeni na.

2

Ti Yomdaanɔ tee manfoor tann

¹ Tɔn, ii nyik biit kur, nan faak kur, nan kpinkpanii, nan funfunn, nan sanjaaɔɔ. ²⁻³ I poɔ la nan ti Yomdaanɔ ɔane, li paak, ii loon Yennu mɔmaan man nan sanpantik nba loon biin biaɔinba na; kimaan maan maɔe saa te ki yin kpaat tinnu sonu ni.

⁴ Baat ti Yomdaanɔ boor man; ɔɔɔe tee manfoor tann nba ki niib yêɔɔ, ɔaan ki Yennu gannɔ ki u ɔan bonchiann na. ⁵ Ɔaant man ki Yennu n jii-i ki yii tee nan manfoor tana na, ki wun maa ɔaak nba ki u Seyeɔɔ sii be li ni; ki i sii tee Yennu mɔɔɔ mɔɔɔ toontunna kii tuun u toonn nan u Seyeɔɔ paɔ, ki u saa gaar li toonn Yiisa Masia paake; ⁶ kimaan li sɔb Yennu gbouɔ ni a:

“Gotir, n gann tann ki bir Sayɔnn doo ni, ki li tee lotik ni tann, ki bia ɔan bonchiann, ki wunba kur teenɔ yada, u kan di fei.”

⁷ Yimm nba teenɔ yada na mi nan u ɔan bonchiann ki turi; ɔaan binba ki teenɔ yada na, bii mi nan li sɔb Yennu gbouɔ ni a:

“Tann nba ki tanmaara yêtir na, ɔanne tan tee lotik ni tanɔann.”

⁸ Li bia sɔb a:

“Tann maɔe ki niib saa gbiat, tanpiiuk maɔe saa te ki niib n baa.”

Baa ki sak Yennu mɔmaan paake ki bi gbiatir, nan waa din sennib biaɔinba na.

⁹ Ɔaan yimm ɔarin tee Yennu nigannkabe, ki bia tee u naan ni niib nba jiantirɔ, ki bia tee nibooru nba tee popeendamm, ki bia tee

u tiŋŋ niib, ki yii moontir ɣoo nba nyinni bunbonn ni, ki baar nani u bakitnaun yentu ni na burchintuk po. ¹⁰ Sianyoo i din ki tee Yennu niibi, ɣaan moʔana i ji tee u niibe; sianyoo u din ki tini ninbaauku, ɣaan moʔana u tini ninbaauka.

Ki jiin Yennu daaba po

¹¹ N naa walonkai, yaa tee saamm tingbouŋ na ni na, n kpaaniie a ii nyik gbanant loonbiit nba kon nan i sei na, ¹² ɣaan kii be fanu tingbouŋ na niib sinsuuk ni, ki li-i tee ki bi sukii-i a i tee biitdamm, bin la i toonjana ki dont Yennu, daar nba ki u tan saa baar na.

¹³ Ti Yomdaano paak, ii saak man yentdamm moi: ii saak kpanbar nba tee yent kur daano na moʔ, ¹⁴ ki waa senn sennu damm nba a bii daar binba tuun toonbiit na tuba, ɣaan kii piak binba tuun toonjana na, ii saak bi moi man.

¹⁵ Kimaan Yennu loomm tee yii tuun toonjanae ki goor jatit maan nba ki mok nyooti. ¹⁶ Ii be yent-n-moŋ binbeŋ; ɣaan i daa dia i yent-n-moŋ binbeŋ maŋ ki li tee yaak ki i tuun toonbiiti, ɣaan kii mok Yennu daaba binbeŋ. ¹⁷ Ii teen soo kur baakir, kii loon Masiaweira, kii tiin Yennu, kii teen kpanbar maŋ baakir.

¹⁸ Yimm nba tee daaba na, ii saak i saakab moi kii teemm baakir, ki li daa tee niŋamm kuukoo kaa, ɣaan nan nibiita. ¹⁹ Li-i tee ki a la tubdatu a toonjana paak, ki dukii Yennu po ki di sukuru, ɣanne saa penn u par; ²⁰ ɣaan fi-i tun biit ki bi dat a tubir, ki a gaar tubdatu na soon nna, nlee ki bi saa pakani? ɣaan fi-i tun linba ɣan ki gaar tubdatu li paak soon

nna, ḡanne saa penn Yennu par. ²¹ Yennu din yiinit a tii di biak, kimaan Masia tiḡḡ din dii biak ti paak, a tii gorii u binbeḡ kii waa u taabana. ²² U din ki tun biit gbaa; ki faak bia ki mi nyii u mḡb ni. ²³ Baa din sukiiḡ, u din ki jiin sukiti; baa din dintḡ biak na, u ki jeen sḡḡ, ḡaan jii u mḡḡ ki teen Yennu nba bu niib buut barmonii na nuu ni. ²⁴ Iḡḡḡ Masia mḡḡ mḡḡe din jii ti toonbiit u gbanant ni, ki bi kpaau dapunpunn paak, a tin nyi biit ni kii tee niḡamm. U daḡ paake ki i la laafia. ²⁵ I din tuu tee nan pebotkai nae, ḡaan mḡtana i jen i kpaaritḡḡ nba guu i sei na boora.

3

Ki jiin poob nan bi sḡrib benu po

¹ Poob, sakin man i sḡrib mḡi. Bi siabi kii teen barḡanii na yada, ḡaan li pasiar i binbenḡḡ paak, bi saa teen yadawa, ki li kii kpaas talas yin yet siar gbaa, ² kimaan bi-i la nan yimm nba teen Yiisa yada na binbeḡ ḡani, bi mun saa teenḡ yadawa. ³ Poob, daa jikit i mḡḡ ki want i fant nan yuloru, koo salima tuliati, koo chinchennḡana ḡbabu kaa. ⁴ Iḡaant man ki i fant-ii tee para nba be soon nna nan ḡminḡminn; ḡanne tee fant nba kan biiri, ki bia ḡan bonchiann Yennu boor. ⁵ Yaayoo ni poḡamm nba din teen Yennu yada na, nnae ki bi din faḡit bi mḡḡ, ki saak bi sḡrib mḡi. ⁶ Nnae ki Sara din saak u sḡrḡ Abraham mḡb ki yiu u yomdaano. Li-i tee ki i tuun ki li ḡan, ki ki tiin siari, ḡann i tee Sara maḡ bonpoie.

⁷ Jab, ii muni be fanu man nan i poob, kii mi nan bi tee tariie i boor, kii teemm baakir, kimaan yimm nan ḡamm kur tan saa gaar Yennu piinḡann nba tee manfoor na; ḡanne saa te ki Yennu n gaar i miaru.

Ki jiin Masiaweira binbeḡ po

⁸ Linba biar tee nnae; i kur-ii mək dudukyenn man, ki i baka-ii be i leeb ni, kii mək lomm nan Masiaweira, kii tiin i leeb ninbaauk, kii sikint i mḡḡ. ⁹ I daa tuun biit ki jiint biit paaki, i bia daa sukii ki jiint wunba sukii-i, ḡaan jiinḡ a “Yennu n teen piisin a paak,” kimaan Yennu din yiini a yin gaar piisime. ¹⁰ Li sob Yennu gbouḡ ni a:

“Wunba loon manfoor nba mək parpeenn,
 ki loon wun tan la benu nba ḡan,
 wun nyinn u mḡḡ barbiit nan faak maan ni,
¹¹ ki nyik biit tumu, ḡaan kii tuun toonḡana,
 ki lon parmaasir sḡnu kii waa-r,
¹² kimaan ti Yomdaanḡ kpaa u ninbina niḡamm
 paake,
 ki bia gbia bi miaru yoo kura;
 ḡaan kḡn nan toonbiit damm na.”

¹³ Li-i tee ki i numm mḡn nan toonḡana tumu, sḡḡ be ki saa teeni siar-ii? ¹⁴ Li-i lekii tee ki i la tubdatu i toonḡana paak, parpeenn sii tee i yare; i daa tiin nisaarik, ki bia daa te ki li daamiini. ¹⁵ Tinin ti Yomdaanḡ Masia i para ni. Ii teen siir yoo kur ki jiin wunba boi-i yaa mək dindann nba na po. ¹⁶ Ii gatḡ soon nna kii tiin Yennu, ki ḡaan ki i benu-ii ḡan, ki bi-i sukii-i, yaa tuun toonḡana Masia paak na, bin di fei bi sukut maḡ ni. ¹⁷ Li-i tee Yennu

loomm nan i di biak toonjana paak, li chee yin di biak toonbiit paak; ¹⁸ kimaan Masia din gaar timm biitdamm kur paak ki kpo yomkooe; nijana maɛe din gaar biitdamm paak ki kpo, a wun te tin saan Yennu boor. Bi din kpiiu, ɲaan ki u bia fiir kuun ni, Yennu Seyeen paɲ ni. ¹⁹ Li Seyeen nie ki u din saan sei nba koo sarik kpeentiɲ na boor, ki saa pak Yennu maan ki turib; ²⁰ ɲamme din tee niib nba ki sak Yennu mɔb, yoo nba ki u din dii sukuru Nowa yoo na, yoo nba ki ɲoo Nowa din ɲamm ɲaringbenir; ki niib banniin kuukoo din koo ɲaruɲ maɲ ki tinn nyun ni na. ²¹ Nyun maɛe tee Yennu nyunwuru ninnaun nba tinnit mɔtana; li ki tee ti gbanant paak wuru kaa, ɲaan li tee taa mei Yennu a wun wuur ti para, Yiisa Masia kuunfiiru na paake. ²² U saan Yendouɲ nie ki be Yennu niidiitu po, ki malakanba nan sanpaapo yentdamm kur saak u mɔb.

4

Ki jiin toonbiit nyiku po

¹ Masia nba din dii biak ti paak na, ii mun chee i para kii dukii nna, kimaan wunba dii gbanant paak biak, u nyii toonbiit tumu niwa. ² Laa jii yoo na ki saa, i daa jikit i gbanant ki tuun nisaarik loonbiiti, ɲaan kii waa Yennu loomm. ³ Yoo nba gar, i din jii i yoo ki tuun toonbiite. I din tuun i mɔɲ loonbiite, ki nyu daan yib, ki di diina ki mɔk fuut, ki tikii leeb danyuboa, ki mann pata, ki tuun nan binba ki tee Masiaweira na nba loon biaɲinba na. ⁴ ɲaan mɔtana, yaa ki waab ki tuun li toonbiit

na, li gbatibe, ki bi ji biir i sana. ⁵ Ŋaan bi tan saa pak bi moŋ biit ki tur Yennu nba teen siir a wun bu footib nan kpeemm buut na. ⁶ Ŋanne teen ki Masia din pak barŋanii na ki tur binba kpo na gbaa; bi lek din kpo nan soɔ kur nba kpenn biaŋinba nae; ki u din pak barŋanii maŋe ki turib a bin la yaak ki bi sei n mək manfoa, Yennu boor.

Ki jiin yan nba ki Yennu teeni na dianu po

⁷ Bona kur gbennu ji ki fək; li paak, ii soor i moŋ kii sub ki fit kii mei Yennu. ⁸ Linba gar bont kur tee yii loon i leebe fanu, kimaan lomm dəkint biit bonchiann. ⁹ Ii gaan leeb saauŋ ki daa burimi. ¹⁰ Soɔ kur nan waa gaar yan nba nyii Yennu boore, i diar fanu ki jii yan maŋ ki somm i leeb. ¹¹ Wunba ki Yennu sennɔ a wuu moontir barŋanii na, wuu moontir linba ki Yennu teenɔ nae; wunba mun ki Yennu sennɔ a wuu sommit leeb, wuu sommitib nan u paŋ nba ki Yennu teenɔ na, ki Yennu n la paku bonsiar kur ni, Yiisa Masia paak; ŋɔɔ Yennu-e yen paku nan paŋ kur mək mək nan mək mək. Mamɔmm.

Ki jiin Masiaweiu biak dinu po

¹² N naa walonkai, yaa di biak nba bikii-i na, i daa te ki li bakitiri ki tee bonsaann i boori. ¹³ Yaa di biak Masia paak na, ii mək parpeenn man, ki yoo nba ki u tan saa nyi paanu nan yentsaakar na, i saa la parpeenn bonchiann. ¹⁴ Bi-i sukii-i Masia sann paak, parpeenn tee i yare, kimaan Yennu Seyeeŋ nba mək paŋ bonchiann na be i ni. ¹⁵ Ŋaan soɔ biak dinu-i tee nikpinu koo nanyuk koo toonbiit tumu koo kpikpiruk toona paak, li ki ŋani; ¹⁶ fi-i di biak

faa tee Masiaweiro na paak, a daa tiin fei, ñaan dont Yennu, Masia sann paak.

¹⁷ Yoo baara ki Yennu saa piin ki bu niib buut. U saa bu u tioŋ niib buute sinsinn; ki li-i tee ki u bu timm nba tee u niib na buut sinsinn, ki binba ki sak u barŋanii na yar ji sii tee nlee?

¹⁸ Li sob Yennu gbouŋ ni a

“Li-i paar ki niŋamm n tinn,
ki biitdamm nan binba ki tiin Yennu na
ji saa teen nlee ki tinni?”

¹⁹ Li paak, binba di biak Yennu loomm paak na, bii tuun toonŋana, ki jii bi moŋ ki pet bi nantoo Yennu nba tee barmonii daano na.

5

Kpaanii

¹ Yimm tɔondamm nba be Yiisaweira sinsuuk ni na, n kpaaniie, min nba mun tee tɔondaano, ki n ninbinn din la Masia nba dii biak biaŋinba, ki n bia saa lakin di manu bonchiann nba tan saa nyi paanu na, ² n kpaaniie, ii guu Yennu niib nba be i nuu ni na, ki li daa tee miar kaa, ñaan kii tee i yanboote, Yennu nba loon biaŋinba; ki li bia daa tee likirii paaki; ñaan tee i kpan koor a i tume. ³ Daa mantik dia niib nba ki Yennu turi na nan ninmonni, ñaan te ki i binbenŋaŋ n wannib baa sii be biaŋinba. ⁴ Ki Masia nba tee yudamm kur yudaano na-i taŋi jen, i saa la nyoot nba kan biiri.

⁵ Nnae mun, yimm nba tee nipaaun, ii saak saakab moi; ki i kur-ii gaan leeb moi, ki teen tarii i leeb boa, kimaan li sob Yennu gbouŋ ni a “Ŋoo Yennu yeen karinbaandamme, ñaan sommit binba sikint bi moŋ na.” ⁶ Li paak, ii

sikin i mɔŋ ki teen Yabint Yennu nuu ni, ki u saa donni yoo nba ki u loon. ⁷ Jiin man i daamii kur ki turo, kimaan u baka be i ni.

⁸ Ii dia i mɔŋ man, kii mi i dataak nba tee Sintaanii na po; u line nan yanbor na, ki loon wun la soɔ ki soor. ⁹ Yêtiriɔ man, ŋaan teen Masia yada fanu, kimaan i mi nan Masiaweira leeb nba be tingbouŋ na ni mun di biak nan yaa di bianjɪnba nae. ¹⁰ Ŋaan li-i tee ki i dii biak yoo waaminna, Yennu nba mɔk ninbatinu kur na saa ŋamm i binbeŋ, ki chee i para, ki turi paŋ; ŋɔɔe din yiini Masia paak a yii di u manu nba kaa gbennu na. ¹¹ Ŋɔɔe mɔk paŋ kura mɔkmɔk nan mɔkmɔk. Mamomm.

Footjoontii

¹² Sailas nba ki n mi nan u tee Masiaweiro nan barmonii na, ŋɔɔe sommin ki n sob gbouŋ nba ki fok na a n chee i para, ki kpaani, nan ŋanne tee Yennu maan nan barmonii. Li paak, ii diar fanu man.

¹³ I leeb nba be Babilonn ki Yennu din gannib na foontii. Mak, wunba tee nan n bija na mun foonti. ¹⁴ Ii foont i leeb nan lomm.

Parmaasir-ii be yimm nba kur tee Masiaweira na paak.

Yennu Gbouŋ Mɔɔr
Bimoba: Yennu Gbouŋ Mɔɔr Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d